

# Stap Fogiv Olsem Nifae

Aisea i no wantem gohed blong stap  
kros long Josh blong oltaem.



I kam long Noelle Lambert Barrus  
(I kamaot long wan tru stori)

Stori ia i hapen long YSA.

Aisea i ron mo kikim balong i go  
long Timothy we i fren blong  
hem long tim blong hem. Hem  
i wajem Timothy i sakem leg blong  
hem i gobak biaen mo i kikim balong  
i go insaed long gol.

“!Poen!” Timothy i singaot taem  
blong i fas long net.

Aisea i singsingaot. !Oli winim gem!

Taem hem i wokbaot i kamaot  
long fil, !hem i filim gud tumas! Be  
afta wan long ol pikinini long nara  
tim, Josh, i singaot wan nogud nem  
long hem.

Aisea i filim sapraes mo i harem  
nogud. Hem i no save wanem blong  
talem. Hem i lukluk daon long graon  
mo wokbaot slo i go long ol fren  
blong hem.

“!Yumi winim!” Timothy i talem.  
“Gudfala pas, Aisea.”

Be Aisea i nomo filim gud tumas. !I  
no afta wanem Josh i bin talem long  
hem! Hem i filim kros mo no hapi.

Long ful dei ia, Aisea i filim olsem  
se wan hevi weit i stap pulum hem  
i go daon. Hem i nomo laekem Josh.

Long naet ia, Aisea i sidaon wetem  
famli blong hem long taem blong  
skripja. Hem i traem blong lisin long  
sista blong hem i rid. Be hem i no  
save stop blong tingbaot wanem we  
Josh i bin talem.

Aisea i lukluk tru long ol pej blong  
Buk blong Momon blong hem. Hem



i stop long wan skripja long 1 Nifae. Hem  
i abaot wan taem we ol brata blong Nifae oli  
no bin kaen long hem.

“Mo i bin hapen se mi fogivim gud tufala,”  
skripja i talem.\*

?Nifae i fogivim ol brata blong hem? Aisea  
i tingting. ?Nomata we oli mekem nogud  
tumas long hem?

Aisea i tingbaot Josh. Hem i no wantem  
holemtaet ol nogud filing ia blong hem from  
Josh blong oltaem. !Hem i gat 10 yia nomo!

Aisea i wantem blong stap olsem Nifae.  
Hem i save fogivim Josh, semmak olsem  
we Nifae i bin fogivim ol brata blong hem.  
Mo sapos Josh i talem wan nogud samting  
bakegen, bae hem i askem Josh blong no  
mekem olsem.

Hem i filim wom mo pis insaed long hem.  
Hem i olsem we Tabu Spirit i stap talem, “Yu  
stap mekem stret samting.”

“?Aisea, wanem nao yu bin lanem aot long  
ol skripja ia?” Mama i askem.

Aisea i lukluk i kam antap. “Sori, mi stap  
ridim wan defren skripja,” hem i talem.  
Hem i talem wanem i bin hapen long futbol,  
wetem famli blong hem.

Mama mo Papa i haggem Aisea. “Mi sori  
we Josh no bin naes long yu,” Papa i talem.  
“Wanem we hem i talem i no tru. Be hem  
i Oraet blong filim nogud long hem.”

Aisea i smael. “Tangkyu. Blong wan smol  
taem, mi bin kros tumas. Be naoia we mi  
ridim ol skripja, mi nomo wantem kros long  
hem. Mi wantem blong fogivim hem. !Mo mi  
filim moa gud finis!”

“!Hemia i gud tumas!” Mama i smael tu.  
“Blong stap fogiv i no isi oltaem. Be yu tru.  
Hem i stret blong mekem.”

Aisea i lukluk daon long ol skripja blong  
hem. !Oli bin helpem hem! Hevi weit we  
i bin stap i nomo gat. Hat blong hem i wom  
insaed mo i fulap long pis. ●

\* 1 Nifae 7:21